



Nappaatit suut napparsimasut sivikitsumik piffissamiluunniit aalajangersimasumik sivilissusiligaanngitsumi Danmarkiliarlutik katsorsartikkiartortariaqalertanerannik kinguneqartarnersut pillugit Naalakkersuisut UPA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimasunik Danmarkimut katsorsartikkiartortunik ikilisisinnaasut ilanngunneqassapput.

(Inatsisartunut ilaasortaq Aqqaluaq B. Egede, Inuit Ataqatigiit)
(Siullermeerneqarnera)

Demokraatini peqqinnisaqarfimmi ajornartorsiutit assigiinngitsut eqqumaffigisorujussuuagut aamma isumaqarpugut suliaassaqartoq angisoorsuarnik piaartumik aallartittariaqakkatsinnik.

2017-mi napparsimasut 797-t nunanut allanut suliaritikkiartorput aamma 2018-mut missingersuutinik malitseqartitsineq naapertorlugu kisitsit milliartortussaarpasingilaq.

Uangut isumaqarput naapertorlugu ajornartorsiut peqqinnisaqarfimmi sulisussarsiortarfimmiippoq tassanerpiarlu iliuuseqartariaqarpugut ajornartorsiut angisooq iluarsivigissagutsigu. Kissaatigaarput sapinngisamik ikinnerpaat nunanut allanut suliaritikkiartortassasut aamma isumaqarpugut nassuiaasiorterup tamanna paasinarsisinnaviangikkaa.

Peqqinnisaqarfiup sukkanerumik passussisalernissaa anguniarlugu sulisussarsisariaqarpugut. Peqqinnisaqarfimmi sulisut sapinngisannguartik tamaat sulerulupput malinnaasinnaajumallutik kinguneranillu passukkasuagassaanngitsut napparsimasut suliaritinnissaminut utaqqisut amerlasuupilussuupput. Inuppassuit nappaataat ajornerulersarput utaqqitillutik allaat utaqqiisaarlutik pinasuartumik passutassanngorsinnaasarput ilaannikkut ima ajortigisumik kinguneqartarluni allaat nunanut allanut suliaritikkiartortariaqartarlutik passukkasuartariaqartaramik imaluunniit ulorianartorsiulersaramik.

Isumaqtigaarput anguniartariaqaratsigu peqqinnisaqarfiup neqeroorutaasa tamanit akuerineqarsinnaanissaat.

Nassuiaasiortoqarnissaa utaqqisinnaanngilarput kingornalu inerniliunneqartut tunngavigalugit iliuuseqarluta, ajornartorsiutimmi naqissuserneqaannartussapput. Kissaatigineruarput peqqinnisaqarfiup nukini tamaasa atussagai sulisussarsiornissaminut nunatsinni napparsimavinnut tamanut nammineerluta napparsimasortagut passuttalerniassagatsigit, utaqqisullulu allattorsimaffianiittut inuit 4.000-t sinnillit ikilisillugit.



Isumaqarpunga peqqinnissaqarfiup ilisimalluaraa suut nappaatit maani nunami suliarineqarsinnaanersut, suullu suliarineqarsinnaannginnersut aamma pisariaqartitsineq ukiumiik ukiumut allanngortartussaavoq apeqqutaalluni immikkut ilisimasallit sorliit nunatsinniissimanersut, taamaattumik nassuiaasiap inerniliinissaa aamma atorsinnaasusaaanngilaq siunissami pisussat eqqarsaatigalugit. Inuttut uanga nammineq isumaqarpunga Dronning Ingridip Napparsimavissua piffissap ingerlanerani sulisuusut tunngavigalugit nammineq tulluussartarsinnaassasoq. Demokraatini taamaattumik isumaqarpugut nukigut atortariaqarigut paasiniallugu qanoq iliorluta sulisussanut pilerisaarisinnaanerluta peqqinnissaqarfimmilu sulisussanik sapinngisamik amerlanerpaanik ilinniartitsilluta.

Malugaarput Naalackersuisut allannguutissamik siunnersuuteqarsimasut. Allannguutissatut siunnersuutip isumaa siunnersuutigineqaqqaartumit allaanerungaanngilaq. Taamaattumik siunnersuutit tamarmik itigartinneqassasut Demokraatini inassutigaarput pissutigalugu peqqinnissaqarfik nammineq pingaarnersiuisariaqarmat anguniarlugu allaffissornerunissamut sapinngisamik ikinnerpaanik immikkoortitsisoqarnissaa. Uanilu qularutigineqarsinnaanngilluinnarpoq siunnersuut pisuulluni Peqqinnissaqarfimmi allaffissorneq anneruliinnassasoq.